

ASO LUA, 29 IANUARI 2019

Na nofoia e le Fofoga Fetalai le Nofoa i le itula e 9:09 i le taeao.

Tatalo.

FOFOGA FETALAI: Ou te faasilasila atu ua toe amatalia nei Tualumaga ma Galuega a le Fono Aoaofa Faitulafono. E avea lenei taeao e faatalofa atu ai ma le agaga faaaloalo i le paia o le Palemene i lau Afioga i le Palemia ae faapea foi le Tamaitai Sui Palemia ma le paia o le Kapeneta, aemaise o Minisita Lagolago, Taitaifono o Komiti eseese a le Palemene ma sui usufono.

E faatalofa atu foi i Ofisa Sili o Pulega o Matagaluega ma Faalapotopotoga a le Malo aemaise o le Ofisa o le Fono Aoaofa ma le auunaga faifaiepea a le malu o le Malo. Malo le onosai, malo foi le soifua manuia i lenei taeao.

TULAFONO TAU FAAOFI O TEUTEUGA O LE TULFAONO O PUIPUIGA MAI AAFIAGA O LE TAPAA 2019 – faitauga faatolu

Afioga Hon TUITAMA TALALELEI TUITAMA (Minisita mo le Soifua Maloloina): Lau Afioga i le Fofoga Fetalai, ua tulili le tai ua taaligoligoa foi le gataifale aua o lea ua matalupe le seuga ua mataiasa foi tiuga, ua atoa tino o le tama na moe i le ana, aua le afio o lau Afioga i le Fofoga Fetalai, faapea sui usufono mamalu o le tatou Palemene i lenei aso. O lea foi ua i luma o le Atua le tatou faapolo ma le faasagi, le faanonogamanu aua le aso ma le alo atu i tiute fai e tusa ma le valaauina o lau Afioga ma lenei Palemene. E ao foi ona molimoli atu le agaga faafetai i lau Afioga i le Fofoga Fetalai mo le faafoeina o le tatou Fonotaga lea ua solomalu ai lo tatou sa, ae aulia mai ai lenei aso. Atonu po o le aso mulimuli foi lenei o le tatou Fonotaga, ua atoa lava ma lelei mea uma ona o lau taitaiga. Faafetai foi i le faasoa a le mamalu o sui usufono o lenei Palemene ua faafaigofie ai le tatou galuega e oo mai i lenei aso.

Lau Afioga i le Fofoga Fetalai, ua ou tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Puipuiga mai Aafiaga o le Tapaa 2019 i lona faitauga faatolu.*

Faaluaina e le Minisita mo Pisinisi, Alamanuia ma Leipa ma le Minisita mo Tagata Tafafao Maimoa Mai.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia e le Fono Aoaofa Faitulafono.

**TULAFONO TAU FAAOFI O TEUTEUGA O LE TULAFONO O AOGA
2019 – faitauga faatolu**

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr SAILELE MALIELEGAOI(Palemia): Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Aoga 2019 i lona faitauga faatolu.*

Faaluaina e le Minisita mo le Soifua Maloloina.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia e le Fono Aoao Faitulafono.

**TULAFONO TAU FAAOFI O TEUTEUGA O LE FAAVAE 2019
- faitauga faatolu**

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr SAILELE MALIELEGAOI: Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Faavae 2019 i lona faitauga faatolu.*

Faaluaina e le Minisita mo Pisinisi, Alamanuia ma Leipa ma le Minisita mo le Soifua Maloloina.

FOFOGA FETALAI: I le usitaia o tuutuuga o le Faavae i Lona Mataupu 109(1), e ao ina faamalieina aiaiga mo palota ia le itiiti i le 2/3 o le aofaiga atoa o le Palemene. Ou te tapa le Failautusi mo le taina o le logo mo le 2 minute.

FESILI: O le Fesili pe o le a faamaonia le lafo, o e finagalo i ai tutulai mai. A maea ona tau lou suafa faamolemole ona e toe alaala mai lea i lalo i lou nofoa.

PALOTA TAUVALAAU T.T.93(1)

1. Susuga Hon Tuilaepa Auelua Fatialofa Lupesoliai Lolofieteele Neioti Aiono Galumalemana Dr. Sailele Malielegaoi.
2. Afioga Hon Fiamé Naomi Mataafa.
3. Afioga Hon Lautafi Fio Selafi Purcell.
4. Afioga Hon Tuitama Talalelei Tuitama.
5. Afioga Hon Sala Fata Pinati.
6. Susuga Hon Papaliitele Niko Lee Hang.
7. Tofa Hon Lopao Natanielu Mua.
8. Tofa Hon Faimalotoa Kika Iemaima Stowers.
9. Afioga Hon Sili Epa Tuioti.

10. Afioga Hon Faaolesa Katopau T. Ainuu.
11. Afioga Hon Afamasaga Lepuiai Rico Tupai.
12. Afioga Taefu Lemi.
13. Afioga Tuifaasisina Misa Lisati Leleisiuao Palemene.
14. Afioga Salausa John Ah Ching.
15. Afioga Amituanai Fagaivalu Kenrick Samu.
16. Susuga Seiuli Ueligitone Seiuli.
17. Tofa Hon Faasootauloa Pati Taulapapa.
18. Afioga Tofa Foleni Tama Galu.
19. Susuga Mulipola Leiataua Laki.
20. Tofa Lenatai Victor Faafoi Tamapua.
21. Afioga Hon Aeau Peniamina Leavaiseeta.
22. Afioga Hon Faumuina Tiatia Faaolatane Liuga.
23. Tofa Hon Lauofo Fonotoe Nuafesili Pierre Lauofo.
24. Afioga Tafua Maluelue Tafua.
25. Afioga Hon Gatoloaifaana Amataga Alesana Gidlow.
26. Afioga Toomata Aki Tuipea.
27. Tofa Nonu Lose Niumata.
28. Afioga Aliimalemanu Alofa Tuuau.
29. Afioga Tapulesatele Mauteni Tamasone Metuli II Esera.
30. Afioga Faaulusau Rosa Duffy-Stowers.
31. Tofa Olo Fiti Afoa Vaai.
32. Tofa Nafaitoa Talaimanu Ketii.
33. Tofa Ili Setefano Taateo Tafili.
34. Afioga Faalogo Iosefa Sopi.
35. Afioga Sulamanaia Fetaiai Tauiliili Tuivasa.
36. Afioga Faumuina Asi Pauli Wayne Fong.
37. Afioga Fuimaono Teo Samuelu Teo.
38. Afioga Leaana Ronnie Posini.
39. Afioga Toleafoa Ken Vaafusuaga Poutoa.

IOE - 39

FOFOGA FETALAI: O e auese i le Lafo faamolemole tutulai mai.

1. Susuga Hon Laauli Polataivao Leuatea.

LEAI - 1

FOFOGA FETALAI: O le iuga lenei o la tatou Palota Tauvalaau i le Tulafono Tau Faaofi o Teuteuga o le Faavae 2019. O e na lagolagoina le Lafo e 39 sui. O e na auese i le Lafo, e toa 1.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia e le Fono Aoao Faitulafono.

TULAFONO TAU FAAOFI O FAIGA PALOTA 2019
- faitauga faatolu

Afioga Hon FAAOLESA KATOPAU T. AINUU (Minisita mo Faamasinoga ma Pulega tau Faamasinoga): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Faiga Palota 2019 i lona faitauga faatolu.*

Faaluaina e le Minisita o Tupe ma le Minisita mo Fesootaiga ma Faamatalaga Tekonolosi.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia e le Maota.

TULAFONO TAU FAAOFI O LE KOMISI O FAIGA PALOTA 2019
- faitauga faatolu

Afioga Hon FAAOLESA KATOPAU T. AINUU: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Komisi o Faiga Palota 2019 i lona faitauga faatolu.*

Faaluaina e le Minisita mo Fesootaiga ma Faamatalaga Tekonolosi.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia e le Fono Aoao Faitulafono.

TULAFONO TAU FAAOFI O TEUTEUGA O LE FAAVAE (NU.2) 2019
- faitauga faatolu

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr SAILELE MALIELEGAOI: Lau Afioga i le Fofoga Fetalai ou te tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o Teuteuga o le Faavae (Nu.2) 2019 i lona faitauga faatolu.*

Faaluaina e le Minisita mo Pisinisi, Alamanuia ma Leipa.

FOFOGA FETALAI: I le usitaia o tuutuuga o le Faavae i Lona Mataupu 109(1), e ao ina faamalieina aiaiga mo palota ia le itiiti ifo i le 2/3 o le aofaiga atoa o le Palemene. Ou te tapa le Failautusi mo le taina o le logo mo le 2 minute.

FESILI: Po o le a faamaonia le lafo, O e finagalo i ai tutulai mai. A maea ona tau lou suafa, alaala i lalo.

PALOTA TAUVALAAU

1. Susuga Hon Tuilaepa Fatialofa Auelua Lupesoliai Lolofietele Neioti Aiono Galumalemana Dr. Sailele Malielegaoi.
2. Afioga Hon Fiamē Naomi Mataafa.
3. Afioga Hon Lautafi Fio Selafi Purcell.
4. Afioga Hon Tuitama Talalelei Tuitama.
5. Afiog Hon Sala Fata Pinati.
6. Susuga Hon Papaliitele Niko Lee Hang.
7. Tofa Hon Lopao Natanielu Mua.
8. Tofa Hon Faimalotoa Kika Iemaima Stowers.
9. Afioga Hon Tialavea Fea Leniu Tionisio Hunt.
10. Afioga Hon Sili Epa Tuioti.
11. Afioga Hon Loau Sola Keneti Sio.
12. Afioga Hon Faaolesa Katopau T. Ainuu.
13. Afioga Hon Afamasaga Lepuiai Rico Tupai.
14. Afioga Taefu Lemi.
15. Afioga Tuifaasisina Misa Lisati Leleisiuao Palemene.
16. Afioga Salausa John Ah Ching.
17. Afioga Amituanai Fagaivalu Kenrick Samu.
18. Susuga Seiuli Ueligitone .Seiuli.
19. Tofa Hon Faasootauloa Pati Taulapapa.
20. Tofa Soalo Umi Feo Mene.
21. Afioga Tofa Foleni Lio Tama Galu.
22. Susuga Mulipola Leiataua Laki.
23. Afioga Alaiasa Muagututia Moefaauouo Sepulona Moananu.
24. Tofa Lenatai Victor Fafoi Tamapua.
25. Tofa Lealailepule Rimoni Aiafi.
26. Afioga Hon Aeau Peniamina Leavaiseeta.
27. Afioga Hon Faumuina Tiatia Faaolatane Liuga.
28. Tofa Hon Lauofo Fonotoe Nuafesili Pierre Lauofo.
29. Afioga Tafua Maluelue Tafua.
30. Afioga Hon Gatoloaifaana Amataga Alesana Gidlow.
31. Afioga Toomata Aki Tuipea.
32. Tofa Nonu Lose Niumata.
33. Afioga Aliimalemanu Alofa Tuuau.
34. Afioga Tapulesatele Mauteni Tamasone Metuli II Esera.
35. Afioga Afoa Amituanai Faleulu Maui.
36. Afioga Faaulusau Rosa Duffy-Stowers.
37. Tofa Nafaitoa Talaimanu Ketu.
38. Tofa Ili Setefano Taateo Tafili.
39. Afioga Faalogo Iosefa Sopi.
40. Afioga Sulamanaia Fetaiai Tauiliili Tuivasa.
41. Afioga Faumuina Asi Pauli Wayne Fong.
42. Afioga Fumaono Teo Samuelu Teo.
43. Afioga Leana Ronnie Posini.
44. Afioga Toleafoa Ken Vaafusuaga Poutoa.

IOE - 44

FOFOGA FETALAI: O e auese i le Lafo faamolemole tutulai mai.

1. Tofa Olo Fiti Afoa Vaai.
2. Susuga Hon Laauli Polataivao Leuatea.

LEAI - 2

FOFOGA FETALAI: O le iuga lenei o le tatou Palota Tauvalaau i le Tulafono Tau Faaofi o Teuteuga o le Faavae (Nu.2) 2019. O e na latou lagolagoina le Lafo e 44. O e na auese i le Lafo e toa 2.

Na faamaonia le lafo ma faitauina le Tulafono Tau Faaofi o Teuteuga o le Faavae (Nu.2) 2019 i lona faitauga faatolu ma faapea ona pasia e le Fono Aoao Faitulafono.

Afioga Hon Faumuina Tiatia Faaolatane Liuga (Palauli le Falefa): Lau Afioga i le Fofoga Fetalai, ina ia faasaosaoina a tatou faamaumauga, e toalima pe toaono tagata e le i ai i le palota muamua ae 46 i le 1. A o lea ua faaopoopo mai sui e toa 4, a o lea ua 42 i le 2. Mo le faasaoga o tatou faamaumauga se i faitau lava po o sao, leaga o lea e sese le faitauga palota muamua, e le 46 i le 1. E tatau ona 39 i le 1. O lea faatoa faaopoopo mai isi sui e toa 5 nei lava, a o lea ua laitiiti le palota lona lua, ae toatele le palota e le i auai sui e toa 5 lea faatoa afifio mai. Ma lou faaloalo lava.

FOFOGA FETALAI: Malo faafetai. Masalo o le a faapena ona silasila i ai le Failautusi o le Fono ina ia toe faasaoina le tulaga lea se i toe siaki atu pei ona laga mai e le sui usufono mo Palauli le Falefa. Se i tulai mai le Sui Palemia.

Afioga Hon Fiaame Naomi Mataafa (Sui Palemia): Lau Afioga i le Fofoga Fetalai, a o faagasolo mataupu faasao, ua matauina i le lona lua lea o tatou palota i le lauina o sui usufono mamalu o le Maota, e talosaga atu i le Failautusi se i faasao ane le suafa o le sui usufono mo Faasaleleaga Nu.1 i Sisifo. O le tatou aga ma le tatou tu Faa-Palemene, e faalupe e sa avea ma Minisita o le Kapeneta i le Honourable. O lea la e matauina o lo o faaaogaina e isi sui usufono e le o i ai le Kapeneta i le taimi nei a o lo o tauaveina pea lena tulaga, ma o lea e talosaga atu ai ina ia tutusa le faiga o suafa o tatou sui usufono. Faafetai.

FOFOGA FETALAI: Malo faafetai. O tu masani ma o aga Faa-Palemene na. Faafetai atu i lau Afioga i le Sui Palemia e tusa ai ma le faasaoga ma le faamanatu i le aufaigaluega galulue. Ou te faamalulu atu foi e asu vaimalu i finagalo o le paia o le Palemene aemaise a outou Afioga o e sa umia le tofi Minisita o le Kapeneta e faapena ona faaopoopoina i lona lava soifua galue ma auauna, o le Honourable le Afioga ia faamauina ma matauina e outou galulue, ma silasila ifo i faasaoga e pei ona i ai le faatulai mai e le sui usufono mo Palauli le Falefa.

FOFOGA FETALAI: Se i tulai mai le Minisita mo Fesootaiga ma Faamatalaga Tekonolosi.

Afioga Hon Afamasaga Lepuiai Rico Tupai (Minisita mo Fesootaiga ma Faamatalaga Tekonolosi): Lau Afioga i le Fofoga Fetalai, pe a faaogaina se fesoasoani mo le faitauina o tatou numera leaga o lea o lo o faafogoga le atunuu, ona o lea sa ou faitau foi i le palota muamua faapea foi i le lona lua.

O le palota muamua lau Afioga e 44 i le 1. A o le palota mulimuli e 47 i le 2. Na ona fesoasoani atu i numera a le tatou Ofisa. Faafetai.

FOFOGA FETALAI: Malo faafetai. Ia se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e pei e lelei ona toe tolaulau mai pea fuainumera, leaga e taua, o lea e faafogafoga mai le atunuu, e tatau foi ona faasao lelei a tatou numera. Ua ou manatua ai le afiafi na faitau ai agai i tua le tasi e oo i le sefulu ae tafana a tatou mea faapapa e faalo ai le Tausaga Fou 2019. Ia o le Leulumoeaga lea sa faitau maia masalo po ua 40+ le matua. O le tagata sa ou manatu e lelei lana fuainumera. Ona faitau loa lea o lana sefulu, 10, 9, 7, 4, misi atoa le 6 ma le 5. O lea la ua ou tilotilo agai i tua ua toa 4 le au faitau palota lea ua nonofo mai i i, ae se i faasao lelei mai, e lelei lava ona agiga i le Maota i le faafogafoga mai a Samoa. E 34 palota lea ou te tau manatu e pasia ai le lafo, o lona uiga la ua leva ona tea mamao le fuainumera lena. Ua leva ona tea mamao, ae o lea ua tete mai luga atu o le 40 ma ona tupu palota, ae lelei lava ona faitau mai pea fuainumera ina ia faamautu ia le faafogafoga mai a Samoa. Faafogafoga mai i o latou sui usufono lea na leai ma faafogafoga mai foi i le latou sui usufono lea na ioe. E taua tele teuteuga lenei o le Faavae. E le faia foi e le Malo se teuteuga e faaletonu mo le atunuu. E ala ona fai nei teuteuga ona o teuteuga e ogaoga le taua, e aoga mo le faatinoga ma le atoatoa o tatou galuega i le agai atu i le lumanai.

Lau Afioga i le Fofoga Fetalai, o le toe faaopopo atu lena.

FOFOGA FETALAI: O le faaiuga o le Palota Tauvalaau i le Tulafono Tau Faaofi o Teuteuga o le Faavae 2019, o e na latou lagolagoina le lafo, e 39. O e na teena, e toa 1.

O le faaiuga i le faiga palota mulimuli i le Faavae, o i latou na lagolagoina le lafo e 44. O e na auese ai i le lafo, e toa 2.

O le faasilasilaga lea ma le agaga faaaloalo. E faamalulu atu i le faitauga e pei ona i ai.

Afioga Aliimalemanu Alofa Tuuau (Alataua Sisifo): Lau Afioga i le Fofoga Fetalai, e le taua tele ae tatau ona faasao. E faigofie lava, e le o i ai Pau, e le o i ai Peseta, o lea faatoa afio mai Loau, e tatau la ona toafa, e tatau la ona 46 le aofai o e na palota, faafetai. Oi, e 45 lea e le i oo mai Afoa. Faafetai.

FOFOGA FETALAI: Malo faafetai. O le agaga lava o le Tulafono ma faiga masani ina ia faapena ona pasia le finagalo o le lafo e ala i le tatou palota tauvalaau ia maua le 2/3. O lea ua masii le numera ma ua faapena ona lagolagoina e le Maota ma ua fulisia i ai le finagalo o le Maota, ae vagana ai le toatasi i le palota muamua ma le toalua i le palota na sosoo ai.

Ae avea foi lenei avanoa ou te faamalulu atu ai i le paia o le Palemene i le silasila mai i le faatinoga ma le matau a le Ofisa, o uiga lava faapenei e ono tupu. Ou te faamalulu atu foi i le faafofoga mai a Samoa, e i ai le taimi e matau ai mulivai i le paia o Mulivai e faitau i ai le atunuu ae galo le mulivai o la e tu ai le faitau mulivai. O le mea la lea, ia malu ave i fale ma tofa i le Atua o le a faapena ona faasaoina ma tuuina i totonu o a tatou faamaumauga.

**TULAFONO TAU FAAOFI O TEUTEUGA O LE FAAVAE (NU.3) 2019
- faitauga faatolu**

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr SAILELE MALIELEGAOI: Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Faavae (Nu.3) 2019 i lona faitauga faatolu.*

Faaluaina e le Minisita mo Pisinisi, Alamanuia ma Leipa ma le Minisita mo le Soifua Maloloina.

FOFOGA FETALAI: I le usitaia o tuutuuga o le Faavae i Lona Mataupu 109(1), e ao ina faamalieina aiaiga mo palota ia le itiiti i le 2/3 o le aofaiga atoa o le Palemene. Ou te tapa le Failautusi mo le taina o le logo mo le 2 minute.

FESILI: Po o le a faamaonia le Lafo, O e finagalo i ai tutulai mai. A maea ona tau lou suafa, alaala i lalo.

PALOTA TAUVALAAU

1. Susuga Hon Tuilaepa Fatialofa Auelua Lupesoliai Lolofieteele Neioti Aiono Galumalemana Dr. Sailele Malielegaoi.
2. Afioga Hon Fiamé Naomi Mataafa.
3. Afioga Hon Lautafi Fio Selafi Purcell.
4. Afioga Hon Tuitama Talalelei Tuitama.
5. Afiog Hon Sala Fata Pinati.
6. Susuga Hon Papaliitele Niko Lee Hang.
7. Tofa Hon Lopao Natanielu Mua.
8. Tofa Hon Faimalotoa Kika Iemaima Stowers.
9. Afioga Hon Tialavea Fea Leniu Tionisio Hunt.
10. Afioga Hon Sili Epa Tuioti.
11. Afioga Hon Loau Sola Keneti Sio.
12. Afioga Hon Faaolesa Katopau T. Ainuu.

13. Afioga Hon Afamasaga Lepuiai Rico Tupai.
14. Afioga Taefu Lemi.
15. Afioga Tuifaasisina Misa Lisati Leleisiuao Palemene.
16. Afioga Salausa John Ah Ching.
17. Afioga Amituanai Fagaivalu Kenrick Samu.
18. Susuga Seiuli Ueligitone Seiuli.
19. Tofa Hon Faasootauloa Pati Taulapapa.
20. Tofa Sooalo Umi Feo Mene.
21. Afioga Tofa Foleni Lio Tama Galu.
22. Susuga Mulipola Leiataua Laki.
23. Afioga Alaiasa Muagututia Moefaaouo Sepulona Moananu.
24. Tofa Lenatai Victor Faafoi Tamapua.
25. Tofa Lealailepule Rimoni Aiafi.
26. Afioga Hon Aeau Peniamina Leavaiseeta.
27. Afioga Hon Faumuina Tiatia Faaolatane Liuga.
28. Tofa Hon Lauofo Fonotoe Nuafesili Pierre Lauofo.
29. Afioga Tafua Maluelue Tafua.
30. Afioga Hon Gatoloaifaana Amataga Alesana Gidlow.
31. Afioga Toomata Aki Tuipea.
32. Tofa Nonu Lose Niumata.
33. Afioga Aliimalemanu Alofa Tuuau.
34. Afioga Tapulesatele Mauteni Tamasone Metuli II Esera.
35. Afioga Afoa Amituanai Faleulu Maui.
36. Afioga Faaulusau Rosa Duffy Stowers.
37. Tofa Nafotoa Talaimanu Ketu.
38. Tofa Ili Setefano Taateo Tafili.
39. Afioga Faalogo Iosefa Sopi.
40. Afioga Sulamanaia Fetaiai Tauiliili Tuivasa.
41. Afioga Faumuina Asi Pauli Wayne Fong.
42. Afioga Fuimaono Teo Samuelu Teo.
43. Afioga Leaana Ronnie Posini.
44. Afioga Toleafoa Ken Vaafusuaga Poutoa.

IOE - 44

FOFOGA FETALAI: O e auese i le Lafo, tulai mai.

1. Tofa Olo Fiti Afoa Vaai.
2. Susuga Hon Laauli Polataivao Leuatea.

LEAI - 2

FOFOGA FETALAI: O le iuga leni o le tatou Palota Tauvalaau i le Tulafono Tau Faaofi o Teuteuga o le Faavae (Nu.3) 2019. O e na lagolagoina le lafo e 44, o e na auese i le leai, e toa 2.

Na faamaonia le lafo ma faitauina le Tulafono Tau Faaofi o Teuteuga o le Faavae (Nu.3) 2019 i lona faitauga faatolu ma faapea ona pasia e le Fono Aoaofaitulafono.

**TULAFONO TAU FAAOFI O ITUMALO PALOTA 2019
- faitauga faatolu**

Afioga Hon FAAOLESA KATOPAU T. AINUU: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Itumalo Palota 2019 i lona faitauga faatolu.*

Faaluaina e le Minisita mo Fesootaiga ma Faamatalaga Tekonolosi ma le Minisita mo Aoga, Taaloga ma Aganuu.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia e le Fono Aoaofaitulafono.

FOFOGA FETALAI: Ia, e momoli atu le faamalo ma le faafetai i le paia o le Palemene aemaise o le Kapeneta e tusa ai o lo outou lavapapale ma le tauatai i le faatinoga o le tatou galuega i lenei taeao. E i ai le manatu e leai lava se faiva e asa ma se maumau, ae manatu foi o le Ofisa o le Fono Aoaofaitulafono i se latou auaunaga. Afai ua le fesootai ao i sa matou taumafaiga, e faamalulu atu, e poto lava le tautai ae sese le atoa atu i liu o lona vaa ae tofa i le Atua e tusa ai o le auaunaga a le Ofisa o le Fono e ala i faamaumauga. E aoga foi mea tutupu e timata ai le upega mo le lumanai. E pei a sau lava le fefe ua faapena foi ona faaletonu tulaga o fuafuaga, o uiga masani e tutupu ma aliali mai i le soifuaga galulue. E ui i lea, e faamoemoe atu ia outou o Taitai o le atunuu ma tama o le atunuu e faapena ona outou faamagalalo se auaunaga ua le tau i le silasila ma le maimoa. Ia ma ua muta ai foi i i galuega a le Fono Aoaofaitulafono sa faatulagaina mo lenei aso. Ae i ai le manatu, e lelei ona lafo atu ia i lau Afioga i le Palemia i sau saunoaga e faaiu ai le tulaga o le tatou galuega. E le faigofie galuega sa feagai ma le Palemene, e le gata i le mamafa, sa faapena ona feliiu ai faalaaui mamafa le paia o le Palemene, aemaise foi o le faafofoga tapuai mai a le atunuu. Ou te tapa ma le faaaloalo lau Afioga i le Palemia.

SAUNOAGA A LE PALEMIA MA LE LAFO MO LE TOLOPOINA

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai faapea foi sui usufono mamalu o le Maota nei, ua iu la tatou galuega sa fuafua mo lenei foi tauaofiaga a lo tatou Palemene. O se tauaofiaga na usui i le tausaga talu ai ia Tesema ona faaauu mai ai lea i lenei tausaga. O lea la ua tatou taunuu i le siui o le tatou tauaofiaga, o le a ea sa matou upu e fai? E na o le faafetai, faafetai i lau Afioga i le Fofoga Fetalai i le faafofoeina o le tatou tauaofiaga. E na o lau Afioga lava o lo o taumafai e

faafoefoe mai le Fonotaga nei. E toatele matou ae o lo o mataituina foi e le o atoatoa lou malosi. Ia tului atu e le Alii le malosi faafouina e faaauau ai ou tiute faa-Taitaifono o le tatou Maota nei.

E momoli foi le faamalo i le tatou Maota, faafetai le usufono, o a tatou Fonotaga foi i tulaga masani, e i ai lava le anava, e le milia faauu a tatou upu, o le faatinoina lea o la tatou tautoga i totonu o le Palemene lenei. O le tautoga i le Atua e faatino o tatou tiute i tulaga silisili, e saunoa ai le sui usufono e tusa o ona talitonuga i le amiotonu, e faatino ai ona tiute o lona sao mo le faaleleia atoa o le tatou atunuu i ona tulaga eseese. E i ai foi taimi e fesiliai ai a tatou upu, tulaga lava ia masani o le Palemene, ae le mafai ona aveesea tu ma aga, e pei ona faaupu ai faamuagagana oE tetele Pesega ae matua lava i le o oö.

O le a faaiu la tatou Fonotaga i le aso, ona agai foi lea o au nei ma le Aiga Kapeneta faapea foi Minisita Lagolago ma le aufaigaluega a le Malo e faatino o outou finagalo, ma a outou fautuaga ua tuuina mai, aua galuega e tatau ona fai mo le manuia au i luma o o tatou tagata, na tofia i tatou tatou te faia mea silisili mo i latou e tusa ai ma le tomai ua foai fua mai e lo tatou Matai ia i tatou. E le mafai foi ona aveesea o tatou lava talitonuga faaletapuaiga, o a outou afioga ua tofofi e le Atua ma lo outou valaauina e tatou te faia galuega lelei mo lo tatou atunuu na filifilia i tatou nei. E filifili i tatou ae tofofi mai le Atua. Ia, ae o le a galulue pea foi outou i tulaga faa-Komiti.

O le fautuaga faifaipea a le Kapeneta ia i latou o Ofisa Sili o Pulega, o le taimi e manaomia ai i latou e a outou Afioga i Komiti e o atu e fai molimau mo le faamalamalamaina o mataupu, ia tuu uma lava a outou galuega, ae sagai ane ai o le tai e fai la outou tautua e tatau ai ona faamalamalama galuega o lo o outou faatinoina, o la outou pitolaau lena. Ae i totonu o le tatou Maota nei, o a foi ni fautuaga e tou te silafia e faaleleia atili ai la tatou galuega, aua le tuua mea e tatau ona fai, aua le tuua foi le tuualalo.

E faapitoa lau tautalaga ia i tatou e toatele, sui usufono o le vaega toatele o le HRPP, o lo o fai pea a tatou Fonotaga faifaipea. Aua foi le tuuina la outou tuualalo, e faapena foi ona feiloai pea feiloai pea ia Ofisa Sili o Pulega faapea foi ma outou uma, e faatalanoaina taualumaga o le faagasologa o a tatou galuega. O le tasi lena auala o lo o uunaia ai le faatinoga o galuega i tua i o tatou itumalo. A matau mai foi, e malaga pea le Kapeneta i tua ma feiloai ma itumalo, i taimi e matauina ai le amatalia po o le faaiuina foi o lea atinae ma lea atinae ona o le tiute lena o tatou e tatau ona o i tua, o e vaai. E le mafai ona tatou iloaina le atoatoa o mea o lo o manaomia e o tatou itumalo pe a tatou le o i tua ma matau taualumaga o atinae o lo o fai.

O le anava foi lea o faigamalo lelei, good governance ia transparent, ia malamalama lo tatou atunuu e auala i galuega e fai, faatino ma faaalu atu i le ea, faaalu atu i televise faamatalaga o lea galuega ua faaiuina ma le manuia. E le tuuina foi le galuega a le Kapeneta o le faasilasila, faalauiloa i le atunuu mea o lo o faaalu i ai tupe a lo tatou atunuu.

A mataitu i le faagasologa o la tatou galuega, e taua tele le Fonotaga lenei sa tatou lauliliuina ai le Tala Faaopoopo o le Tupe, e le gata i lena o Tulafono e o faatasi mo le faatupeina o atinae. E tele Tulafono ia ua pasia i totonu o le Maota lenei. O le feau taua i le Tala Faaopoopo o le Tupe lenei, e toe faamanatu ai pea, o le tala faaopoopo e na o se tala faaopoopo, e faamaea ai galuega e tatau ona

faamaea. E toe manaomia ai nisi seleni e tatau lava ona ioeina e le Palemene ina ia faatino ai ma faamaea a tatou polokalame ua uma ona faataatitia mo lenei foi tausaga faaletupe se i faaiu mai ia Luni o le tausaga nei, ona maea ai lea o lenei foi tausaga faaletupe o lo o faagasolo pea. A o le tele o galuega ua uma lava ona faataoto mai le Tala Autu. O mea ia e tatau foi ona faamalamalama ma le tuuina ai le faailo pea e le o taofia a tatou galuega o lo o faagasolo pea. Ua tatou faalogologo i le CNN i TV e oo lava i le Malo tele o Amerika ua close le Malo. Ua taofia galuega a le Malo Tele o le lalolagi. Aisea? E oo foi i le Malo tele o Amerika e oa, o le Malo aupito i mauoloa i le lalolagi, ae faagasolo lava a latou galuega i luga foi o latou tala autu o le tupe. A alu alu lava ua leai se seleni, e oo lava i le Malo tele ua taofi galuega ua leai se tupe. O lea ua tatou vaavaai atu i ai, ma e le o se taimi muamua lenei ua tupu ai uiga faapea. Na tupu foi i isi nofoaiga muamua, a o se tala lelei lea tatou te tilotilo pea i ai, o mea e fai i Malo tetele, o lea foi e faatino e lo tatou Malo.

O le faatauaina la o le Tala o le Tupe Faaopopo o lenei tausaga, o lea e faamatalatala ma faamanatu mai ai pea ma faamalamalama atili ai pea, e leai se mea e soona popolevale ai. Ua tatou faalogo soo lava i upu felafai solo e tagata e le malamalama, ò lea ua tatou aitalafu, ua tatou o e aumai aitalafu e totogi ai isi aitalafu, o lea lava e faamalamalama ma faamalamalama pea. Ina ua uma ona totogi a tatou aitalafu, ma faataatia seleni e faagaoioi ai le Malo, ona ova ai lea o le \$154miliona, o lea la ua faaoga e le Malo mo atinae le \$154 miliona tala lea. Aisea? Ona o atinae nei lau Afioga i le Fofoga Fetalai e tupu ai le mafai e le Malo, ona tagofia faafitauli ogaoga tau le atinae. O a faafitauli ia?

Lau Afioga i le Fofoga Fetalai, mai le taimi na amata ai la tatou Paeaiga lenei, e toatele e le i fananau mai, ae uma ane la tatou Paeaiga ua lima tausaga o isi ua fananau 4 3 2 1 tausaga o isi, aua e fananau pea fananau pea le atunuu. O le a le uiga o lea tulaga? E manaomia faleaoga e faaaooga ai fanau. E manaomia le auaunaga faafomai ia siitia mo i latou e fananau pea. E pei ona ou faamanatu atu, e uma la tatou Paeaiga lenei ua fia afe ma le tai 5 tausaga agai ifo i lalo na tatou tauto i le aso lea ae le i fananau mai. E tupu pea tupu pea tupu pea le manao, ae tatau ona faatino e i tatou auala e fofo ai. Ae e leai nisi o toe aisili, o lea ua totofi mai tatou i totonu o le Palemene lenei, ia tatou o mai e fai le tatou galuega, ina ia fofo ai faafitauli ia e tulai mai pea tulai mai pea i totonu o Samoa. E pei ona ou taua atu i le tele o faasilasilaga e le malamalama ai tagata e faatupu vevesi, e \$154miliona le seleni o lea e faagaoioi ai atinae fou ma atinae faaauau ma fesoasoani mai ai ma Malo mai fafo. Ae \$154miliona lo tatou sao, ua ova atu i luga o aitalafu a le atunuu. O lea la e lava le faasoa, ma e le o tuuina foi lau Afioga i le Fofoga Fetalai, le saili seleni saili seleni pea, aua e tele lava le mau mea faafuasei e oso mai. O lea na faasalalau atu e le Malo, ua taofi mai e Niu Sila le faiga fou i fanau a le atunuu ua aafia ai le 20 o a tatou tama fanau mo sikolasipi. O le a le mea na fai e le Malo? E manaomia le \$600,000 e silia ma le ½ miliona, faatino lava i le iuga a le Kapeneta, ma o mea na e fai e le Kapeneta e mataala i taimi uma i mea e tatau ona fai. Lau Afioga i le Fofoga Fetalai, o le vaega tele lena o le Fonotaga lenei ma le taua.

O le vaega lona lua, o le sao lena o le Paeaiga lenei, o le sao ogaoga, i le pasiaina lea o le toe faatulagaina o tuaoi o o tatou itumalo ina ia fofo ai le faafitauli lenei, i le tupu pea tupu pea o tagata palota i totonu o itumalo ae e le o paleni, e le o

paleni le tulaga o lo o faatino ai. O isi itumalo ua toatele tagata ae le talafeagai ma sui usufono e tatau ona saofafai i le fonousu a Samoa e momoli o latou sao. O le a le fofu lea sa fai? E na o le pau lava lea o le fofu, faalua sui usufono, ona agai atu ai lea i isi mau mea sese, e le paleni, o le te i lava ua ave le isi sui usufono faaopoopo i le isi itumalo, faalua ai ma palota a le tagata o le itumalo. O le a le mea ua lua ai ae taitasi isi itumalo? O le a le mea ua lua ai sui usufono ae taitasi isi itumalo? O lea ua fof . Tasi le itumalo tasi le sui usufono, tasi le tagata tasi le palota, toe faatulaga foi ma tuaoi. O le toe faatulagaga la ia o tuaoi, e le o se taimi muamua lea ua fai ai. Na amata mai i le faatulagaga o tuaoi o Safata, o Faasaleleaga Nu 1 o Salega, o le itumalo a i latou Tutu Toatasi, ma le itumalo tele o Falealili. O lea na amata muamua i ina, o lea la ua tatou oo i le faaiuga o teuteuga ma suiga, o le tulaga o a tatou faiga palota i le 28 tausaga o faagasolo suiga aoga o le Faigamalo leni a le HRPP ma o le laasaga faaiuga lea o le fetuunai o Tuaoi Palota.

Na amata mai lava i le tatala atu i tua o palota i le 1991, ina ia palota loa faifeau, o o latou faletua ma taulelea. O mea ia sa le mafai ona o tatou faatinoina i le tausaga e 1962. Ae na tuu mai lava e o tatou tuua, a oo lava i le taimi ua talafeagai, faatino loa e tatou. Na faatino e o tatou tuua, e o tatou tama, o le Faavae ia teuteuga i lena foi taimi. Ae lafo mai ia i latou e mulimuli mai e faatinoina, e tusa ai ma le taimi e tatau ai teuteuga ua talafeagai. E tatou te le faia ni Tulafono e afaina ai o tatou itumalo. Ae o le tofia o i tatou lau Afioga i le Fofoga Fetalai, o le tofia lea tatou te omai e galulue, e le faapea na ona tatou omai ma tatou faalua ai i nofoa nei.

E toe tasi le isi matatia maoae lea o lo o totoe, o lo outou sao lena i le atunuu e tau ai mea na faia e le Paeaiga leni. E i ai le sao lea e mulimuli mai, lea na amata atu nei, o le sao lea i le fofu o le isi faafitauli ogaoga tele lea e faafeagai ma i tatou ma o tatou aiga, o measina a Samoa e le gata i eleele ae faapena foi ma tulaga tau Faamasinoga, Faamasinoga o Fanua ma Suafa o aiga ma faafitauli o faafeagai nei ma le Faamasinoga. O ai e tua i ai o tatou aiga, o ai e tua i ai? E leai nisi e tua i ai. Ua faulalai le mau faaiuga e le i faia. O ai la e faia mea ia? O ai e fofoina? E leai nisi e fofoina, e na o le pau lava le malosia o lea e i ai e mafai ona fofu ai mea ia o le Palemene leni. Ae afai na o le tatou nofonofu ai lava ma nofonofu ai lava ma faaluelue i Nofoa nei, lau Afioga i le Fofoga Fetalai, e matua afaina measina a Samoa.

E manaomia e le Faamasinoga se fesoasoani, e matua manaomia lava e le Faamasinoga le fesoasoani. O fea e sau ai le fesoasoani lena? E sau mai totonu o le Maota leni. O le ala lena ou te faamalo atu ai i le Komiti, le Komiti sa o latou lauliliuina le faafitauli lea ma latou aumaia ai ni fautuaga taua tele, ua uma ona fai e latou le galuega o le valaau o Samoa atoa e o mai i totonu e aumai a latou molimau. O le a le ituaiga fesoasoani tatou te mafai ona fai mo le Matagaluega o Fanua ma Suafa ma le Faamasinoga? Ua tele mau faaiuga faale Faamasinoga sa le i sau. Ua ova i le 300 talosaga apili na i ai. Ua fia sefulu tausaga o faatali, e oo mai nei, o la lava e faatali isi faaiuga fai. E le gata i suafa tetele, o fanua, o feeseeseaiga i tuaoi. O le tuaoi o Atua na fai i le 1989, 1999, 2009, 2019 ua 30 tausaga talu ona fai le iuga. Ae o la faatoa fua i le taimi leni tuaoi o Atua, i le tulaga lea o le tuai ona faatino.

E pei lava ona tatou faalogo pea faalogo pea i le mau faaiuga faa-faamasinoga o lo o talia pea. Ae o le a le taiala silisili mo Alii Faamasino? Justice delayed is justice denied. O le tuai ona faatino le faamasinoga o le amiotonu o le atili faaaau ai pea foi lena o le le amiotonu. Ma o le faiaga, e matua manaomia ai lava e le Faamasinoga se fesoasoani. O lea la na fai ai e le Palemene lenei le Komiti Faapitoa, auai mai i ai le atunuu e fai a latou molimau aumai lea o le lipoti lena i totonu o le Palemene lenei, talia e le Palemene. Toe tuu atu foi lea i tua i le Malo, e tapena se Tulafono e tuu i ai i totonu mea ia ua fautua mai ai le Komiti i le Palemene aua e le mafai ona alulua seiloga e faatulafonoina. O lea ua toe foi mai le Tulafono i totonu, o le Tulafono na afua atu i le tofamamao a outou o Taitai o Samoa na filifilia. O lea ua uma ona fai i ai lo outou finagalo, o lea foi la ua toe tuu atu i tua i tulaga o aga Faapalemene, e toe valaau foi le atunuu e toe omai e toe molimoli mai o latou finagalo po o ua faamalieina o latou finagalo. O taiala uma e i totonu o pulega lelei po o le good governance, o Faigamalo lelei. . O le Faigamalo lelei o le fai ma tapa tagatanuu lautele, e aumai o latou finagalo. O lea foi la o le a toe fai le consultation, e toe lafo atu i le komiti o avanoa ua uma, ia e faaalua ai o outou finagalo ona toe foi mai ai foi lea i le Maota nei ona pasia ai loa lea.

I lau matau i le Paeaiga lenei, o sao ogaoga ia e lua lau Afioga i le Fofoga Fetalai, o le tulaga lenei o le ave o le fesoasoani ua manaomia e le Faamasinoga, ae na o tatou lava i le Palemene lenei e mafai ona avatu ai le fesoasoani lea, e mafai ai ona latou faafoeina i se tulaga malosia ma le maopoopo ma le mautu ia le faatinoga o a latou foi faaiuga faale Faamasinoga.

Ma le vaega lua lea ua maea na outou faataoto, o le laasaga mulimuli lenei o le faasologa o le faaleleia atili o a tatou faiga palota, lea na faaalua ai outou finagalo i le po anapo, ma faaalua loa i totonu o le pasia o Tulafono o le Teuteuina o le Faavae ina ia atagia ai suiga tetele ia. Ma e tasi lava le tulaga e agai i ai nei suiga ogaoga, ia manuia le atunuu. E uma atu tatou ae ua taoto Faavae e limataitaiina ai le filemu, po o le stability o Faigamalo a Samoa, mo le agai atu i le lumanai. O tatou tiute na, na tofia mai ai i tatou i le Palemene lenei.

O le ala lea e le uma ai le agaga faafetai ia outou Afioga i le onosaia pea o a tatou Fonotaga uumi nei se i soalaupule mataupu ogaoga nei. O mataupu e totago ae i totonu o a tatou felafolafoaiga i le tofamamao ma le faautaga oooo ua tatala ai la outou tof teu mau. E na o le pau lava lenei o le Fonousu a Samoa, e omai i ai sui usufono filifilia o itumalo, o outou o tootooau o outou itumalo. O lea ua faaee i o outou tauau mamalu ma paia o itumalo faa-palota o Samoa aua Aiga ma a latou Tama tainane le Usoga a Tumua ma Puleono o Salafai. Lau Afioga i le Fofoga Fetalai o le faafetai lea.

O le talosaga i le Atua o manatu, ia saga foai mai pea ia te outou sui usufono filifilia o le Maota lenei le tofamamao ma le faautaga oooo, ma le soifua faafouina aua le faatinoina o outou tiute. E le o toe umi foi, o lea ua tatou taunuu tonu i le afa o lenei foi Paeaiga. Ia sagai ane ai o le tai, faaosofia moegaluaga maua le upega lauga, maua le tofamamao aua le faatinoina o tatou tiute na tatou tauto ai i luma o le Atua.

Lau Afioga i le Fofoga Fetalai, manuia foi le tapuaiga a Samoa i ona tulaga faalupe, i Lana Afioga Mamalu O Le Ao O le Malo faapea foi le Sui Tofia, le Faamasinoga. Le paia i le tapuaiga a Aiga ma a latou Tama, Tama ma o latou

Aiga faapea Tumua ma Pule Ituau ma Alataua, Aiga i le Tai ma le Vaa o Fonoti. O auuuna a le Atua o lo o latou faanonomanu mo se manuia au i luma o le Maota nei aemaise foi Samoa o lo o tapuai mai.

Ona faataʻi lea o so matou leo faaifo mai lagi manu mo le Maota nei. Soifua ma ia manuia.

Lau Afioga i le Fofoga Fetalai ou te faatu le lafo, *Ina ia tolopoina nei Taualumaga a le Fono Aoao Faitulafono se i aulia le Aso Lua 19 Mati 2019 i le itula e 9:00 i le taeao.*

Faaluaina e le Minisita mo Pisinisi, Alamanuia ma Leipa ma le Minisita mo le Soifua Maloloina.

Na faamaonia le lafo.

FOFOGA FETALAI: Ia, ua logo faafofoga le paia i le Palemene i le saunoaga a le Afioga i le Palemia, i nisi o mea sa faapena ona asa mai ai la tatou Fonotaga mai lena vaiaso ua faapena toe faamanino ma toe faamalamalama atili. E le gata i le paia o le Palemene, ae faapea foi le faafofoga tapuai mai a le atunuu, ae a foi tootoouli o le Talalelei.

O le tiute lava lea e tusa ai ma la tatou tautoga, e tatou te taumafai mai ina ia aveia i tatou o taitai o le atunuu e ala i le palotaina o i tatou e ala i le mamalu o le atunuu, ina ia faatino lo tatou fai mea sili aua le tapuaiga a Samoa ina ia faatino i le agaga o le faamaoni, e faapea foi le le faaituau. O le agaga maualuga lena e tusa ai o le tatou tautoga ua to i ai se manatu ona o le saunoaga a le Afioga i le Palemia, aua tatou te fefefe e faatino a tatou tiute, leaga o le valaauina o le filifiliga mai le Atua, ina ia faapena ona faatino o tatou tiute i le agaga ma le faamaoni, e aunoa ma le faaituau.

Malo malele e aotauina ai foi le tulaga o le faafofoga mai a le Palemene aemaise foi o le faafofoga mai a Samoa. O avanoa e le maua, e maua avanoa e aumai e le Atua, e faatino ai le tatou feau ma galuega.

Ua ou manatu ua lava ma totoe le saunoaga a le Palemia e faaiu ai la tatou Fonotaga i lena foi masina.

Ona faapea lea, e i ai le mataupu a le Fofoga Fetalai e fia faamanatu atu i le paia o le Palemene faamolemole, e faamanatu atu ina ia i o a tatou pepa o a tatou Fonotaga e pei ona tufatufaina atu, ou te tatalo atu ma le agaga faaaloalo faamolemole pe mafai ona tapena au pepa ina ia mafai ona teuina, ona e le fai mo i tatou le Maota nei. E i ai nisi o Fonotaga o lo o faapena ona tapena mai ae ia malu puipua pepa a le Palemene ma a tatou Fonotaga. O le ala lea o le tatalo e faamanatu atu, faamolemole ia i lalo o lau vaavaaiga au lava pepa, ina ia mafai ona tapena i le fale, pepa o le tatou Fonotaga.

O le faaaliga lea ma le agaga faaaloalo. E i ai le manatu ua lava ma totoe le saunoaga a le Palemia ua faapena foi ona pai atu i le tapuaiga a Samoa.

O lena Samoa lau faafofoga mai, o le saunoaga lena e fai mo le Palemene i lena aso.

Ae tatou te le i tolopo e pei ona tuuina mai le lafo, o le a faaiuina la tatou Fonotaga i se tatalo e le Afioga i le sui usufono mo Falelatai ma Samatau, le susuga i le Aoao.

Na tolopo Taulumaga a le Fono Aoao Faitulafono i le itula e 10:27 i le taeao seia aulia le itula e 9:00 i le taeao o le Aso Lua, 19 Mati 2019.